

■ CONVIVENZA

Da stailas stizzadas e glischantas

DA PIEDER CAMINADA*

Vus enconuschais segir Katharina Michel. U forsa betg? Ma Salome Clausen di a Vus franc insatge. Sche betg, dun jau a Vus anc ina davosa schanza: tge As di il num Carmen Fenk?

Sche Vus stuais capitular tar tuttas trais dumondas, essas Vus – perdunai mia formulaziun clera e netta – ina banausa da cultura. Pertge che Katharina Michel, Salome Clausen e Carmen Fenk èn stars – «music stars» per esser in zic pli concret. E forsa en l'entira Svizra ils unics stars che quasi nagin n'enconuscha (pli).

Quatter staffas da la show da casting «music star» ha la Televisiun Svizra SRF emess tranter il 2003 ed il 2009. Cun ina quota d'aspectatur remargtabla – almain a l'entschatta. Ma da las quatter victuras da «music star» ha sulettamain la gudagnadra dal 2007, Fabienne Louves, cuntanschè almain in grad da reputaziun relativ. Las autras trais «stailas» èn deditg stizzadas.

Tuttina ha «music star» fatg nascher in star: Sebastian Bürgin. Tge, Vus n'al enconuschais era betg? Bain, bain, Vus stuais enconuscher el. Pertge che Sebastian Bürgin è preschent permanentamain en il



«Blick» ed en la Televisiun Svizra. Durant il campiunadi mundial da ballape per exempel sco giast en l'emissiun «Letschi Rundi». U dacurt sco grillader en l'emissiun «Talk am Grill». En las duas emissiuns plitost peniblas n'è il star Sebastian Bürgin dentant betg sa preschentà cun ses num civil – mabain cun ses num d'artist Baschi. Tut cler?

Tgi avess supponì quai l'enviern 2004? En l'emprima staffa da «music star» era il star ozendi omnipreschent anc in disdider, era vegnì eliminà gia baud. Dentant tut quels che schevan lezza giada che Baschi na sappia insumma betg chantar endretg, han fatg il quint senza Baschi e l'industria da divertiment. Sche quella vul, fa ella in star er or d'in satg da tartuffels. Ed uschia è Baschi cun sia vusch cratschlanta oz cun grond avantatg vers tut tschels finalists da «music star» il musicist cun il pli bler success.

Ord vista professionala n'è dentant betg il conquistader da la parada da hits Baschi il meglier musicist da tut ils «music stars», mabain Mario Pacchioli. Quel ha suenter ses segund plaz en l'emprima staffa da «music star» relativamain spert renunzià al divertiment superfizial da la scena da musica ed ha frequentà a Paris ina scolaiziun da teater. En il frattempo è el sa sviluppà ad in artist serius e multifar – e quai senza ch'ina publicitad pli gronda avess prendì enconuschientscha da quai. La cumprova: sut il titel «Remas» ha Pacchioli mess en musica poesias ruman-tschas e cumponì la musica per in entir orchester – bainchapi per mintga singul instrument. Quant bun che Mario Pacchioli è era sco chantadur, ha el mussà avant intginas emnas a Cuira, nua ch'il public ha applaudì ad el en pe per sia represchentaziun impresunanta da «Remas».

In star sco Baschi n'è Mario Pacchioli – malgrà sias qualitads – enfin oz betg daventà. Ma el è la cumprova viventa ch'il meglier n'è er en la musica betg adina quel cun il pli bler success commercial. Gist sco en la vaira vita.

*Pieder Caminada è mainaproject scolaziun e redactor tar la «Südostschweiz». El è creschi si a Glion en in ambient per gronda part tudestg e viva oz en il vitg rumantsch da Castisch.